




經籍典第四十卷

經籍總部紀事二

後漢書循吏傳王景字仲通少學易遂廣闢衆書又好天文術數之事沉深多伎藝辟司空伏恭府時有薦景能理水者永平十二年議修汴渠乃引見景問以理水形便景陳其利害應對敏給帝善之又以嘗修浚儀功業有成乃賜景山海經河渠書禹貢圖景以爲六經所載皆有卜筮作事舉止質於著龜而衆書錯糅吉凶相反乃參紀衆家數術文書家宅禁忌堪輿日相之屬適於事用者集於大衍元基云

宦者傳蔡倫字敬仲始給事宮掖元初四年帝以經傳之文多不正定乃選通儒謁者劉珍及博士良史詣東觀各讎校漢家法令倫監典其事

曹騰字季興沛國譙人也安帝時除黃門從官順帝在東宮鄧太后以騰年少謹厚使侍太子書

呂强字漢盛爲人清忠奉公時宦者濟陰丁翦下邳徐衍南陽郭耽汝陽李巡北海趙祐等五人稱爲清忠皆在里巷不爭威權巡以爲諸博士試甲乙科爭第高下更相告言至有行賂定蘭臺漆書

經字以合其私文者乃白帝與諸儒共刻五經文於石於是詔蔡邕等正其文字自後五經一定爭者用息趙祐博學多覽著作校書諸儒稱之

儒林傳序昔王莽更始之際天下散亂禮樂分崩典文殘落及光武中興愛好經術未及下車而先訪儒雅採求闕文補綴漏逸先是四方學士多懷挾圖書遁逃林藪自是莫不抱負墳策雲會京師范升陳元鄭興杜林衛宏劉昆桓榮之徒繼踵而集於是立五經博士各以家法教授易有施孟梁丘京氏尚書歐陽大小夏侯詩齊魯韓毛禮大小戴春秋嚴顏凡十四博士太常差次總領焉建武五年迺修起太學稽式古典籩豆千戚之容備之於列服方領習矩步者委它乎其中 初光武

遷還洛陽其經牒祕書載之二千餘兩自此以後參倍於前及董卓移都之際吏民擾亂自辟雍東觀蘭臺石室宣明鴻都諸藏典策文章競共割散其縑帛圖書大則連爲帷蓋小迺制爲膝囊及王允所收而西者裁七十餘乘道路艱遠復棄其半矣後長安之亂一時焚蕩莫不泯盡焉

文苑傳傳毅字武仲少博學建初中爲蘭臺令史拜郎中與班固賈逵共典校書 黃香字文彊

江夏安陸人也年九歲失母思慕憔悴殆不免喪鄉人稱其至孝年十二太守劉護聞而召之署門

下孝子甚見愛敬香家貧內無僕妾躬執苦勤盡心奉養遂博學經典究精道術能文章京師號曰天下無雙江夏黃童初除郎中元和元年肅宗詔香詣東觀讀所未嘗見書所著賦牋奏書令凡五篇 劉珍字秋孫一名寶南陽蔡陽人也少好學永初中爲謁者僕射鄧太后詔使與校書劉駙駙馬融及五經博士校定東觀五經諸子傳記百家藝術整齊脫誤是正文字永寧元年太后又詔珍與駙駙作建武已來名臣傳遷侍中越騎校尉延光四年拜宗正明年轉衛尉卒官著誄頌連珠凡七篇又撰釋名三十篇以辨萬物之稱號云 崔琦字子璋濟北相瑗之宗也少游京師以文章

博通稱所著賦頌銘箴弔論九咨七言凡十五篇

邊韶字孝先陳留浚儀人也以文學知名

教授數百人韶口辯曾晝日假臥弟子私嘲之曰邊孝先腹便便懶讀書但欲眠韶潛聞之應時對曰邊爲姓孝爲字腹便便五經笥但欲眠思經事寐與周公通夢靜與孔子同意師而可嘲出何典記嘲者大慙著詩頌碑銘書策凡五十篇 劉梁字曼山梁宗室子孫而少孤貧賣書於市以自

資常疾世多利交以邪曲相黨迺著破羣論時之覽者以爲仲尼作春秋亂臣知懼今此論之作俗士豈不愧心其文不存又著辯和同之論迺更大作講舍延聚生徒數百人朝夕自往勸誠身執經

古今圖書集成
卷試策殿最儒化大行此邑至後猶稱其教焉

侯瑾字子瑜敦煌人也少孤貧依宗人居性篤

學恆傭作爲資暮還輒爨柴以讀書常以禮自牧獨處一房如對嚴賓焉州郡屢召公車在道微並稱疾不到作矯世論以譏切當時而徙入山中覃思著述以莫知於世故作應賓難以自寄又接漢記撰中興以後行事爲皇德傳三十篇行於世餘所作雜文數十篇多亡失西河人敬其才而不敢名之皆稱爲侯君云 高彪字義方爲諸生游太學有雅才而訥於言嘗從馬融欲訪大義融疾

不獲見迺覆刺遺融書融省書慙追謝還之彪逝而不顧後郡舉孝廉試經第一除郎中校書東觀數奏賦頌奇文因事諷諫靈帝異之時京兆第五永爲都督御史使督幽州百官大會祖餞於長樂觀議郎邕蔡等皆賦詩彪獨作箴邕等甚美其文以爲莫尙也後遷內黃令帝勅同僚臨送祖於上東門詔東觀畫彪像以勸學者

方術傳北海王和平性好道術自以當仙濟南孫邕少事之從至京師會和平病歿邕因葬之東陶有書百餘卷藥數囊悉以送之後弟子夏榮言其尸解邕乃恨不取寶書仙藥焉

逸民傳梁鴻字伯鸞受業太學貧而尙節介博覽無不通而不爲章句入霸陵山中以耕織爲業詠

詩書彈琴以自娛

高鳳字文通南陽葉人也少爲書生家以農畝爲業而專精誦讀晝夜不息

妻嘗之田曝麥於庭令鳳護鷄時天暴雨而鳳持竿誦經不覺潦水流麥妻還怪問之鳳方悟之其後遂爲名儒乃教授業於西唐山

法真字高卿扶風郿人南郡太守雄之子也好學而無常

家博通內外圖典爲關西大儒弟子自遠方至者陳留范冉等數百人

列女傳扶風曹叔世妻者同郡班彪之女也名昭字惠班一名姬博學高才世叔早卒有節行法度兄固著漢書其八表及天文志未及竟而卒和帝詔昭就東觀臧書閣踵而成之帝數召入宮令皇后諸貴人師事焉號曰大家每有貢獻異物輒召大家作賦頌及鄧太后臨朝與聞政事以出入之勤特封子成關內侯官至齊相時漢書始出多未能通者同郡馬融伏於閣下從昭受讀後又詔融兄續繼昭成之作女誡七篇有助內訓馬融善之令妻女習焉昭女妹曹豐生亦有才惠爲書以難之辭有可觀昭年七十餘卒所著賦頌銘誄問注哀辭書論上疏遺令凡十六篇子婦丁氏爲撰集之又作大家讚焉

董祀妻者同郡蔡邕之女也名琰字文姬博學有才辨又妙於音律祀爲屯

田都尉犯法當死文姬詣曹操請之操因問曰聞夫人家先多墳籍猶能憶識之不文姬曰昔亡父

古今圖書集成
賜書四千許卷流離塗炭罔有存者今所誦憶裁四百餘篇耳操曰今當使十吏就夫人寫之文姬曰妾聞男女之別禮不親授乞給紙筆真草唯命於是繕書送之文無遺誤後感傷離亂追懷悲憤作詩二章

博物志蔡邕有書萬卷漢末年載數車與王粲粲亡後相國掾魏諷謀反粲子與焉既被誅邕所與粲書悉入粲族子葉字長緒卽正宗父正宗卽輔嗣兄也初粲與族兄凱避地荊州依劉表表有女表愛粲才欲以妻之嫌其形陋周率乃謂曰君才過人而體躁非女聲才凱有風貌乃妻凱生葉卽女所生

三國志魏書武帝紀注孫盛異同雜語云太祖博覽羣書特好兵法抄集諸家兵法名曰接要又注孫武十三篇皆傳於世 太祖拜議郎常托疾病告歸鄉里築室城外春夏習讀書傳秋冬獵以自娛樂

袁渙傳注袁氏世記曰布之破也陳羣父子時亦在布之軍見太祖皆拜渙獨高揖不爲禮太祖甚嚴憚之時太祖又給衆官車各數乘使取布軍中物唯其所欲衆人皆重載唯渙取書數百卷資糧

而已衆人聞之大慙渙謂所親曰脫我以行陳令軍發足以爲行糧而已不以此爲我有由是厲名也大悔恨之太祖益以此重焉

田疇傳疇字子泰右北平無終人也好讀書善擊劍

王脩傳袁氏政寬在職勢者多畜聚太祖破鄴籍沒審配等家財物貨以萬數及破南皮閭脩家穀不滿十斛有書數百卷太祖歎曰士不妄有名乃禮辟爲司空掾

鄒原傳注原別傳曰原十一而喪父家貧早孤鄰有書舍過其傍而泣師問曰童子何悲原曰孤者易傷貧者易感夫書者必皆有父兄者一則羨其不孤二則羨其得學心中惻然而爲涕零也師亦哀原之言而爲之泣曰欲書可耳答曰無錢資師曰童子苟有志我徒相教不求資也於是遂就書一冬之間誦孝經論語及長欲遠游學詣安丘孫崧崧曰兗豫之上吾多所識未有若君者當以書相分原重其意難辭之持書而別原心以爲求師啟學志高者通非若交游待分而成也書何爲哉乃藏書於家而行單步負笈苦身持力至陳留則師韓子助潁川則宗陳仲弓汝南則交范孟博涿郡則親盧子幹歸以書還孫崧解不致書之意後爲郡所召署功曹主簿

管寧傳注傳子曰胡徵君怡怡無不愛也雖僕隸必加禮焉外同乎俗內秉純絜心非其好王公不能屈年八十而不倦于書籍者吾於胡徵君見之矣

王朗傳朗字景興東海郡人也以通經拜郎中明帝卽位進封蘭陵侯轉爲司徒朗著易春秋孝經周官傳奏議論記咸傳於世太和二年薨諡曰成侯子肅嗣

王肅傳弘農董遇等亦歷注經傳頗傳於世注魏略曰遇字季直性質訥而好學興平中關中擾亂

與兄季中依將軍段熲採梠負販而常挾持經書投閑習讀其兄笑之而遇不改及建安初王綱小設郡舉孝廉稍遷黃門侍郎是時漢帝委政太祖遇旦夕侍講爲天子所愛信明帝時入爲侍中大司農數年病亾初遇善治老子爲老子作訓注又善左氏傳更爲作朱墨別異人有從學者遇不肯教而云必當先讀百遍而義自見從學者云苦渴無日遇言當以三餘或問三餘之意遇言冬者歲之餘夜者日之餘陰雨者時之餘也由是諸生少從遇學無傳其朱墨者

王肅傳注薛字夏宣聲天水人也博學有才文帝嘉其才黃初中爲祕書丞帝每與夏推論書傳未嘗不終日也每呼之不名而謂之薛君

劉放傳注資別傳曰資字彥龍幼而岐嶷三歲喪二親長于兄嫂講業太學博覽傳記同郡王允一見而奇之

蘇則傳注魏略曰則世爲著姓隱於郡南太白山中以書籍自娛

杜畿傳注杜氏新書曰寬字務叔敏而好古少長京師而篤志博學絕于世務其意欲探賾索隱由此顯名年四十二而卒經傳之義多所論駁草創未就

任城威王彰傳彰字子文少善射御膂力過人手格猛獸不避險阻數從征伐志意慷慨太祖抑之曰汝不念讀書慕聖道而好乘汗馬擊劍此一夫之用何足貴也課彰讀詩書彰謂左右曰丈夫一爲衛霍將十萬騎馳沙漠立功建號何能作博士邪

陳思王植傳植字子建年十歲餘誦讀詩論及辭賦數十萬言善屬文

中山恭王褒傳褒少好學年十餘歲能屬文每讀書文學左右常恐以精力爲病數諫止之然性所樂不能廢也每兄弟游娛褒獨譚思經典文學防輔相與言曰受詔察公舉錯有過當奏及有善亦宜以聞不可匿其美也遂共表稱陳褒美褒聞之大驚懼責讓文學曰修身自守常人之行耳諸君

乃以上聞適所以增其負累也且如有善何患不聞而遽共如是是非益我者其誠慎如此

王粲傳粲字仲宣獻帝西遷粲徙長安左中郎將蔡邕見而奇之時邕才學顯著貴重朝廷常車騎填巷賓客盈坐聞粲在門外倒屣迎之粲至年既幼弱容狀短小一坐盡驚邕曰此王公孫也有異才吾不如也吾家書籍文章盡當與之初粲與人共行讀道邊碑人問曰卿能闇誦乎曰能因使背而誦之不失一字觀人圍碁局壞粲爲覆之碁者不信以帊蓋局使更以他局爲之用相比較不誤一道其強記默識如此性善算作算術略盡其理善屬文舉筆便成無所改定時人常以爲宿構然正復精意覃思亦不能加也著詩賦論議垂六十篇

王粲傳注華嶠漢書曰應瑒祖奉字世叔才敏善諷誦故世稱應世叔讀書五行俱下著後序十餘篇爲世儒者

劉劭傳劭字孔才黃初中爲尚書郎散騎侍郎受詔集五經羣書以類相從作皇覽明帝卽位拜騎都尉與議郎庾綖荀詵等定科令作新律十八篇著律略論正始中執經講學賜爵關內侯凡所撰述法論人物志之類百餘篇

劉劭傳注先賢行狀曰繆斐字文雅該覽經傳事親色養徵博士

仲長統著昌言

注

龔撰統昌言表稱統字公理少好學博涉書記贍于文辭

魏略曰蘇林字孝友博學多通古今字指凡諸書傳文間危疑林皆釋之建安中爲五官將文學甚見禮待黃初中爲博士給事中文帝作典論所稱蘇林者是也

廬江何氏家傳曰明帝時有譙人胡康年十五以異才見送又陳損益求試劇縣詔特引見衆論翕然號爲神童詔付祕書使博覽典籍帝以問祕書丞何禎康才何如禎答曰康雖有才性質不端必有負敗後果以過見譴

楊俊傳俊字季才避地并州本郡王象少孤特爲人僕隸年十七八見使牧羊而私讀書因被箠楚俊嘉其才質卽贖象著家聘娶立屋然後與別

注

魏略曰詔撰皇覽使象領祕書監象從延康元年

始撰集數歲成藏于祕府合四十餘部部各有數十篇通合八百餘萬字

王昶傳樂安任昭先淳粹履道內敏外恕

注

昭先名嘏別傳曰嘏八歲喪母號泣不絕聲以至性見

稱年十四始學疑不再問三年中誦五經皆究其義兼包羣言無不綜覽

鍾會傳注會時遭所生母喪其母傳曰夫人性矜嚴明於教訓會雖童稚勤見規誨年四歲授孝經七歲誦論語八歲誦詩十歲誦尚書十一誦易十二誦春秋左氏傳國語十三誦周禮禮記十四誦成侯易記十五使入太學問四方奇文異訓謂會曰學猥則倦倦則意怠吾懼汝之意怠故以漸訓汝今可以獨學矣雅好書籍涉歷衆書特好易老子每讀易孔子說鳴鶴在陰勞謙君子藉用白茅不出戶庭之義每使會反覆讀之曰易三百餘爻仲尼特說此者以謙恭慎密樞機之發行已至要榮身所由故也順斯術已往足爲君子矣

管輅傳注別傳曰輅父爲瑯琊卽丘長時年十五來至官舍讀書始讀詩論語及易本便開淵布筆辭義斐然單子春欲得見輅輅父卽遣造之子春曰吾欲與卿旗鼓相當輅言始讀詩論易本學問微淺未能上引聖人之道陳秦漢之事但欲論金木水火土鬼神之形狀耳于是唱大論之端遂經于陰陽文采葩流枝葉橫生少引聖籍多發天然

蜀書秦宓傳宓字子勅少有才學廣漢太守夏侯纂請宓爲師友祭酒領五官掾稱曰仲父宓稱疾臥在茅舍纂將功曹古朴主簿王普廚膳卽宓第宴談宓臥如故纂問朴曰至於貴州養生之具實

絕餘州矣不知士人何如餘州也朴對曰乃自先漢以來其爵位者或不如餘州耳至於著作爲世師式不負於餘州也嚴君平見黃老作指歸揚雄見易作太元見論語作法言司馬相如爲武帝制封禪之文于今天下所共聞也

向朗傳朗字巨達初朗少時雖涉獵文學然不治素檢以更能見稱自去長史優游無事垂三十年乃更潛心典籍孜孜不倦年踰八十猶手自校書刊定謬誤積聚篇卷於時最多開門接賓誘納後進但講論古義不干時事以是見稱上自執政下及童冠皆敬重焉

孟光傳光字孝裕河南洛陽人漢太尉孟郁之族靈帝末爲講部吏獻帝遷都長安遂逃入蜀劉焉父子待以客禮博物識古無書不覽尤銳意三史長於漢家舊典好公羊春秋而譏呵左氏每與來敏爭此二義光常曉曉謹昨先主定益州拜爲議郎與許慈等並掌制度後進文士祕書郎郤正數從光諮訪光問太子所習讀并其性情好尚正答曰奉親虔恭夙夜匪懈有古世子之風接待羣僚舉動出於仁恕光曰如君所道皆家戶所有耳吾今所問欲知其權略智調何如也儲君讀書寧當傲吾等竭力博識以待訪問如博士探策講試以求爵位邪當務其急者正深謂光言爲然

尹默傳默字思潛梓潼涪人也益部多貴今文而不崇章句默知其不博乃遠游荊州從司馬德操
宋仲子等受古學皆通諸經史

李譔傳譔字欽仲梓潼涪人也父仁字德賢與同縣尹默俱遊荊州從司馬徽宋忠等學譔具傳其
業又從默講論義理五經諸子無不該覽著古文易尚書毛詩三禮左氏傳太元指歸皆依準賈馬
異于鄭元與王氏殊隔初不見其所述而意歸多同景耀中卒時又有漢中陳術字申伯亦博學多
聞著釋問七篇益都耆舊傳及志位歷三郡太守

張裔傳裔字君嗣治公羊春秋博涉史漢汝南許文休入蜀謂裔幹理敏捷是中夏鍾元常之倫也
譙周傳周字允南幼孤與母兄同居既長耽古篤學家貧未嘗問產業誦讀典籍欣然獨笑以忘寢
食研精六經尤善書札頗曉天文而不以留意諸子文章非心所存不悉徧視也後遷光祿大夫位
亞九列周雖不與政事以儒行見禮時訪大議輒據經以對而後生好事者亦咨問所疑焉凡所著
述撰定法訓五經論古史考書之屬百餘篇

譙周傳注華陽國志曰文立字廣休少治毛詩三禮兼通羣書刺史費禕命爲從事章奏詩賦論頌

凡數十篇

益部耆舊傳任安廣漢人少事楊厚究極圖籍游覽京師還家教授與董扶俱以學行齊聲

吳書嗣主孫休傳休字子烈銳意於典籍欲畢覽百家之言尤好射雉春夏之間常晨出夜還唯此時舍書休欲與博士祭酒韋曜博士盛沖講論道藝曜沖素皆切直布恐入侍發其陰失令已不得專因妄飾說以拒遏之休答曰孤之涉學羣書略徧所見不少也其明君闇主奸臣賊子古今賢愚成敗之事無不覽也今曜等入但欲與論講書耳不爲從曜等始更受學也縱復如此亦何所損君特以曜等恐道臣下姦變之事以此不欲令入耳如此之事孤已自備之不須曜等然後乃解也此都無所損君意特有所忌故耳布得詔陳謝重自序述又言懼妨政事休答曰書籍之事患人不好之無傷也此無所爲非而君以爲不宜是以孤有所及耳王務學業其流各異不相妨也

劉繇傳注續漢書曰繇祖父本師受經傳博學羣書號爲通儒舉賢良方正寵字祖榮受父業以經明行修舉孝廉

吳宗室傳瑜字仲異濟陰人馬普篤學好古瑜厚禮之使二府將吏子弟數百人就受業遂立學官

臨饗講肄是時諸將皆以軍務爲事而瑜好樂墳典雖在戎旅誦聲不絕

張昭傳昭字子布少好學博覽衆書與琅琊趙昱東海王朗俱發名友善弱冠察孝廉不就與朗共論舊君諱事州里才士陳琳等皆稱善之

顧雍傳雍長子邵字孝則博覽書傳好樂人倫少與舅陸績齊名而陸遜張敦卜靜等皆亞焉

步騭傳騭字子山避難江東單身窮困以種瓜自給晝勤四體夜誦經傳赤烏九年代陸遜爲丞相猶誨育門生手不釋書被服居處有如儒生

嚴峻傳峻字曼才彭城人也少耽學善詩書三禮又好說文避亂江東與諸葛瑾步騭齊名著孝經傳潮水論又與裴元張承論管仲季路皆傳于世

闕澤傳澤字德潤會稽山陰人也家世農夫至澤好學居貧無資常爲人傭書以供紙筆所寫既畢誦讀亦遍追思論講究覽羣籍兼通歷數由是顯名赤烏五年拜太子太傅領中書如故澤以經傳文多難得盡用乃斟酌諸家刊約禮文及諸注說以授二宮爲制行出入及見賓儀又著乾象歷注以正時日每朝廷大議經典所疑輒諮訪之以儒學勤勞封都鄉侯